

Mid-Day Dogri News Bulletin, 03 October 2025

समे 12:25 hrs.

<><><><><><>

Dy CM-Bridges

उपमुख्यमंत्री सुरिंद्र चौधरी होरें 3 पुलें दी परियोजनाएं लेई नीहू पत्थर रक्खेआ जेड़े नौशहरा तगर दे शिड़क संपर्क गी बढ़ावा देङन। इन्दे च अंद्रुथ च नाबार्ड दे अंतर्गत अंद्रुथ नाले पर फुटपाथ सने 50 मीटर मोटरेबल पुल जेदी लागत 292 लक्ख ऐ। रतन गला कलसियां च 28 मीटर मोटरेबल पुल, जेदी लागत तकरीबन 284 लक्ख ऐ ते अंद्रुथ नाले पर गै 50 मीटर दा पुल जेदी लागत 400 लक्ख रपे ऐ। इनें त्रवें परियोजनाएं गी मंजूरी दिक्ती गई। लोकें उप-मुख्यमंत्री हुंदा इनें पुलें दी नीहू रखने लेई शुक्रिया कीता। अपने दौरे दुरान उनें कलसियां च इक लोक दरबार बी रक्खेआ ते कई लोकें दे मसलें दा उस्सै बेल्ले नबेड़ा कीता।

<><><><><><>

Poonch-Rana

जल शक्ति ते ग्रामीण विकास मंत्री जावेद अहमद राणा होरें माली ब'रा 2025-26 लेई बालाकोट ते मनकोट ब्लाकें च विकास कम्में दा जायजा लैने लेई इक समीक्षा बैठक दी अध्यक्षता कीती। उनें 'मनरेगा' ते प्रधानमंत्री आवास योजना-ग्रामीण जनेहूी योजनाएं गी समें उप्पर लागू करने उप्पर जोर दिक्ता ते अधिकारियें गी आखेआ जे ओह मजूरी दे वितरण गी यकीनी बनान ते आवास परियोजनाएं गी होर तेजी कन्नै बधाना। मंत्री होरें पारदर्शिता ते मैहकमे बश्कार आपसी तालमेल बनाने दा आह्वान कीता। इस दुरान उनें स्वच्छ भारत मिशन ते पंचैत घर निर्माण दे तैहत कम्में दी प्रगति दी बी समीक्षा कीती गई। उनें SHG ते टिकाऊ जल विभाजन परियोजनाएं दे समर्थन उप्पर जोर भरेआ ते सरकार दी समावेशी ते लोक केंद्रित ग्राएं दे विकास आस्तै अपनी प्रतिबद्धता गी दोहराया।

<><><><><><>

SMVD-Drive

लेफ्टिनेंट गवर्नर मनोज सिन्हा हुंदे दिशा-निर्देशें हेठ श्री माता वैश्वो देवी श्राइन बोर्ड दे चेयरमैन होरें गी रियासी जिले दे सरकारी स्कूलें च हाल च होई दी बरखा ते ल्हास-पस्सियां पौने करी होई दी तबाही दा जायजा लैने आस्तै ते उत्थे नवीनीकरण अभियान चलाने आस्तै आखेआ गेआ ऐ। श्राइन बोर्ड दी इस पहलकदमी दा मकसद स्कूली ढांचागत गी तौले शा तौले बहाल करना ऐ तां जे विद्यार्थी बगैर कुसै रूकावट

दे अपनी पढाई जारी रखी सकन। श्राइन बोर्ड उस क्षेत्र दे विद्यार्थियों दी पढाई च समर्थन देने ते समुदायें दी बेहतरी आस्तै बचनबद्ध ऐ।

<><><><><><>

Sewa Parv

सेवा पर्व 2025 दा समापन जम्मू खित्ते च बक्ख-बक्ख समारोहें ते व्यापक जनभागीदारी कन्नै होआ। 15 दिन चलने आहले इस अभियान दरान बक्ख-बक्ख समारोह कराए गए जिंदा मकसद साफ-सफाई, पर्यावरण संरक्षण ते सामाजिक जिम्मेदारी हा। बसोहली दे अटल सेतू उपपर बी इक बड्डे पैमाने पर सफाई अभियान चलाया गेआ जेदे च अधिकारिएं ते लोकें बधी चढियै हिस्सा लैता। डोडा च बी सफाई कर्मचारिएं गी सम्मानित कीता गेआ ते कई सारे ग्राएं च बूहटे लाने दा अभियान चलाया गेआ। उधमपुर च टी.बी दे मरीजें गी पोषण किट्टां आवास योजनाएं दे तैहत मंजूरी पत्र बंडे गए ते टी.बी जागरूकता अभियान चलाए गए। अधिकारिएं नागरिकें गी साफ-सफाई लेई वंचित वर्गें दा समर्थन करने लेई ते गांधीवादी मूल्यें गी बनाए रखने लेई आग्रह कीता।

<><><><><><>

GST-Stationery Items

सरकारै पढाई-लिखाई यानि स्टेशनरी समेयान पर जीएसटी कटौती कीती ऐ जेदे कन्नै विद्यार्थिएं गी मती राहत मुहैया करोआई गेई ऐ ते खुदरा विक्रेताएं गी पेंसिल, कापिएं, रबड़ ते शार्पनर पर जीएसटी घट्ट करियै इसी सिफर करी दित्ता ऐ जेडा पैहले थमां 5 थमां 12 फीसद दी दर थमां घट्ट ऐ। जमेटरी बाँक्स ते गणितीय सरबन्धी उपकरणें दे सेटें गी हून सिर्फ 5 फीसद जीएसटी दी दर कन्नै आकर्षक बनाया गेआ ऐ। इस गैंड कन्नै जरूरी शैक्षणिक उपकरणें गी होर किफायती ते पुज्ज योग बनाने दी मेद ऐ।

<><><><><><>

Bharat Darshan Tour

नौजवानें गी प्रेरित करने दे इक जतन दे तैहत जम्मू दे डीआईजी शिव कुमार शर्मा होरें कल जम्मू जिले दे 95 विद्यार्थिएं गी गुलशन ग्राउंड थमां भारत दर्शन दौरे लेई झंडी दस्सियै खाना कीता। हफ्ते भरै दे इस कार्यक्रम दा आयोजन सिविक एक्शन प्रोग्राम आहली पैहलकदमी दे तैहत कीता गेदा ऐ ते इस दरन विद्यार्थिएं गी दिल्ली ते मुंबई दे दौरे पर लेता जा'रदा ऐ। इस दौरे दा मकसद विद्यार्थिएं गी भारत दी सगोसार संस्कृति, विरासत ते विकास दे खेत्तर च हासल उपलब्धिएं बारै जानकार बनाना ऐ। अधिकारिएं मेद बुज्झी ऐ जे एह

दौरा विद्यार्थीएं गी नमियां चीजां सखाने दे कन्नो-कन्नो उं'दे अंदर राश्ट्री गर्व दी भावना भरने च बी बड़ा कारी दा साबत होग।

<><><><><><>

Jammu-Train

यात्रुएं दी बधदी मंग गी पूरने ते यात्रा गी सुचारू बनाने लेई उत्तरी रेलवे दे जम्मू डिविजन नै श्री माता वैश्वो देवी कटड़ा-बनिहाल-कटड़ा बश्कार 3 अक्तूबर थमां 7 अक्तूबर तगर स्पेशल ट्रेन दी सेवा गी बधाया ऐ। आकाशवाणी जम्मू दे संवाददाता दी रिपोर्ट मूजब स्पेशल ट्रेन जेडी श्री माता वैश्वो देवी कटड़ा-बनिहाल-कटड़ा लेई 15 दिनें लेई यानि 19 सितंबर थमां 3 अक्तूबर तगर चलाई गई ही, उसी यात्रुएं दी मंग गी दिखदे होई 7 अक्तूबर तगर अगड़ा बदाई दित्ता गेआ ऐ।

<><><><><><>

Weather

मौसम विभाग श्रीनगर ने औंदी 4 थमां 7 अक्तूबर बश्कार पच्छमी ब्हाएं च खौदल करी जम्मू-कश्मीर च मौसम खराब रौहने दी भविक्खवाणी कीती ऐ। इस दरान प्रदेश दे उच्चे प्हाड़ी इलाकें च बर्फबारी होने ते कन्नै हौली थमां दरम्याने दर्जे दी बरखा बरने दे असार न ते मौसम च इस तब्दीली कन्नै तापमान च बी खरी मती गिरावट दर्ज कीती जाह्ग। एह्दे अलावा पहलगाम, गुलमर्ग ते सोनामर्ग ज्नेय इलाकें च भारी बर्फबारी दा अंदाजा बी जताया गेआ ऐ। प्रदेश दे पदरे इलाकें च इस अवधि दरान दरम्याने दर्जे थमां बड़ी भारी बरखा बरने दे असार न जदके जम्मू संभाग दे इलाकें च बी गरज चमक कन्नै भारी बरखा बरने ते अंधी-झक्खड़ झुल्लने दी भविक्खवाणी कीती गई ऐ। मौसम विभाग ने इस अवधि दरान केई थाहें पर ल्हास-पस्सियां ते कुप्पड़ पौने दे खतरे बारे बी खबरदार कीता ऐ।

<><><><><><>